

Titus

¹ Yih khat Paulus kī taraf se hai jo Allāh kā k̄hādīm aur Īsā Masīh kā rasūl hai.

Mujhe chun kar bhejā gayā tāki maiñ imān lāne aur k̄hudātars zindagī kī sachchāī jān lene meñ Allāh ke chune hue logon kī madad karūñ.

² Kyonki us se unheñ abadī zindagī kī ummīd dilāī jātī hai, aisī zindagī kī jis kā wādā Allāh ne duniyā ke zamānon se peshtar hī kiyā thā. Aur wuh jhūṭ nahīñ boltā.

³ Apne muqarrarā waqt par Allāh ne apne kalām kā elān karke use zāhir kar diyā. Yihī elān mere sapurd kiyā gayā hai aur maiñ ise hamāre Najātdahindā Allāh ke hukm ke mutābiq sunātā hūñ.

⁴ Maiñ Titus ko likh rahā hūñ jo hamāre mushtarakā imān ke mutābiq merā haqīqī beṭā hai.

K̄hudā Bāp aur hamārā Najātdahindā Masīh Īsā āp ko fazl aur salāmatī atā karen.

Krete meñ Titus kī K̄hidmat

⁵ Maiñ ne āp ko Krete meñ is lie chhoṛā thā ki āp wuh kamiyāñ durust karen jo ab tak rah gaī thīñ. Yih bhī ek maqsad thā ki āp har shahr kī jamāt meñ buzurg muqarrar karen, jis tarah maiñ ne āp ko kahā thā.

⁶ Buzurg be'ilzām ho. Us kī sirf ek bīwī ho. Us ke bachche imāndār hon aur log un par aiyāsh yā sarkash hone kā ilzām na lagā sakeñ.

⁷ Nigarān ko to Allāh kā gharānā sañbhālne kī zimmedārī dī gaī hai, is lie lāzim hai ki wuh be'ilzām ho. Wuh ḳhudsar, ḡhusilā, sharābī, larākā yā lālchī na ho.

⁸ Is ke bajāe wuh mehmān-nawāz ho aur sab achchhī chīzoñ se pyār karne wālā ho. Wuh samajhdār, rāstbāz aur muḡaddas ho. Wuh apne āp par qābū rakh sake.

⁹ Wuh us kalām ke sāth liptā rahe jo qābil-e-etamād aur hamārī tālīm ke mutābiq hai. Kyoñki is tarah hī wuh sehhatbaḳhsh tālīm de kar dūsroñ kī hauslā-afzāi kar sakegā aur muḳhālafat karne wāloñ ko samjhā bhī sakegā.

¹⁰ Bāt yih hai ki bahut-se aise log haiñ jo sarkash haiñ, jo fuzūl bāteñ karke dūsroñ ko dhokā dete haiñ. Yih bāt ḳhāskar un par sādiq ātī hai jo Yahūdiyoñ meñ se haiñ.

¹¹ Lāzim hai ki unheñ chup karā diyā jāe, kyoñki yih lālch meñ ā kar kāi logoñ ke pūre ghar apnī ḡhalat tālīm se ḳharāb kar rahe haiñ.

¹² Un ke apne ek nabī ne kahā hai, “Krete ke bāshinde hameshā jhūṭ bolne wāle, wahshī jānwar aur sust peṭū hote haiñ.”

¹³ Us kī yih gawāhī durust hai. Is wajah se lāzim hai ki āp unheñ saḳhtī se samjhāeñ tāki un kā imān sehhatmand rahe

¹⁴ aur wuh Yahūdī farzī kahāniyoñ yā un insānoñ ke ahkām par dhyān na deñ jo sachchāi se haṭ gae haiñ.

¹⁵ Jo log pāk-sāf haiñ un ke lie sab kuchh pāk hai. Lekin jo nāpāk aur imān se ḳhālī haiñ un ke lie kuchh bhī pāk nahīn hotā balki un kā zahan aur un kā zamīr donoñ nāpāk ho gae haiñ.

¹⁶ Yih Allāh ko jānane kā dāwā to karte haiñ, lekin un kī harkateñ is bāt kā inkār kartī haiñ. Yih ghinaune, nāfarmān aur koī bhī achchhā kām karne ke qābil nahīn haiñ.

2

Sehhatbaḥsh Tālīm

¹ Lekin āp wuh kuchh sunāeñ jo sehhatbaḥsh tālīm se mutābiqat rakhtā hai.

² Buzurg mardoñ ko batā denā ki wuh hoshmand, sharīf aur samajhdār hoñ. Un kā imān, muhabbat aur sābitqadmī sehhatmand hoñ.

³ Isī tarah buzurg ḵhawātīn ko hidāyat denā ki wuh muqaddasīn kī-sī zindagī guzāreñ. Na wuh tohmat lagāeñ na sharāb kī ḡhulām hoñ. Is ke bajāe wuh achchhī tālīm dene ke lāyq hoñ

⁴ tāki wuh jawān auratoñ ko samajhdār zindagī guzārne kī tarbiyat de sakeñ, ki wuh apne shauharoñ aur bachchoñ se muhabbat rakheñ,

⁵ ki wuh samajhdār * aur muqaddas hoñ, ki wuh ghar ke farāyz adā karne meñ lagī raheñ, ki wuh nek hoñ, ki wuh apne shauharoñ ke tābe raheñ. Agar wuh aisī zindagī guzāreñ to wuh dūsroñ ko Allāh ke kalām par kufr bakne kā mauqā farāham nahīn kareñgī.

⁶ Isī tarah jawān ādmियोñ kī hauslā-afzāi kareñ ki wuh har lihāz se samajhdār zindagī guzāreñ.

* **2:5** Yūnānī lafz meñ zabt-e-nafs kā unsur bhī pāyā jātā hai.

7 Āp ҡhud nek kām karne meñ un ke lie namūnā baneñ. Tālīm dete waqt āp kī ҡhulūsdiḷī, sharāfat

8 aur alfāz kī be'ilzām sehhat sāf nazar āe. Phir āp ke muḵhālif sharmindā ho jāenge, kyonki wuh hamāre bāre meñ koī burī bāt nahīn kah sakeñge.

9 Ġhulāmoñ ko kah denā ki wuh har lihāz se apne mālikoñ ke tābe raheñ. Wuh unheñ pasand āeñ, bahs-mubāhasā kie baġhair un kī bāt māneñ

10 aur un kī chīzeñ chorī na kareñ balki sābit kareñ ki un par har tarah kā etamad kiyā jā saktā hai. Kyonki is tariqe se wuh hamāre Najātdahindā Allāh ke bāre meñ tālīm ko har tarah se dilcash banā deñge.

11 Kyonki Allāh kā najātbāḡhsh fazl tamām insānoñ par zāhir huā hai.

12 Aur yih fazl hameñ tarbiyat de kar is qābil banā detā hai ki ham bedīnī aur duniyāwī ҡhāhishāt kā inkār karke is duniyā meñ sama-jhdār, rāstbāz aur ҡhudātars zindagī guzār sakeñ.

13 Sāth sāth yih tarbiyat us mubārak din kā intazār karne meñ hamārī madad kartī hai jis kī ummīd ham rakhte haiñ aur jab hamāre azīm Ґhudā aur Najātdahindā Īsā Masīh kā jalāl zāhir ho jāegā.

14 Kyonki Masīh ne hamāre lie apnī jān de dī tāki fidyā de kar hameñ har tarah kī bedīnī se chhurā kar apne lie ek pāk aur maḡhsūs qaum banāe jo nek kām karne meñ sargarm ho.

15 Inhīn bātoñ kī tālīm de kar pūre iḡhtiyār ke

sāth logoñ ko samjhāeñ aur un kī islāh kareñ.
Koī bhī āp ko haqīr na jāne.

3

Masīhī Kirdār

¹ Unheñ yād dilānā ki wuh hukmrānoñ aur ikhtiyār wāloñ ke tābe aur farmāñbardār raheñ. Wuh har nek kām karne ke lie taiyār raheñ,

² kisī par tohmat na lagāeñ, amnpasand aur narmdil hoñ aur tamām logoñ ke sāth narm-mizājī se pesh āeñ.

³ Kyonki ek waqt thā jab ham bhī nāsamajh, nāfarmān aur sahīh rāh se bhaṭke hue the. Us waqt ham kaī tarah kī shahwatoñ aur ghalat khāhishoñ kī ghulāmī meñ the. Ham bure kāmōñ aur hasad karne meñ zindagī guzārte the. Dūsre ham se nafrat karte the aur ham bhī un se nafrat karte the.

⁴ Lekin jab hamāre Najātdahindā Allāh kī mehrbānī aur muhabbat zāhir huī

⁵ to us ne hameñ bachāyā. Yih nahīn ki ham ne rāst kām karne ke bāis najāt hāsil kī balki us ke rahm hī ne hameñ Rūhul-quds ke wasīle se bachāyā jis ne hameñ dho kar nae sire se janm diyā aur naī zindagī atā kī.

⁶ Allāh ne apne is Rūh ko baṛī faiyāzī se hamāre Najātdahindā Īsā Masīh ke wasīle se ham par unḍel diyā

⁷ tāki hameñ us ke fazl se rāstbāz qarār diyā jāe aur ham us abadī zindagī ke wāris ban jāeñ jis kī ummīd ham rakhte haiñ.

⁸ Is bāt par pūrā etamād kiyā jā saktā hai.

Main chāhtā hūn ki āp in bāton par khās zor den tāki jo Allāh par imān lāe haiñ wuh dhyān se nek kām karne meñ lage raheñ. Yih bāteñ sab ke lie achchhī aur mufid haiñ.

⁹ Lekin behūdā bahsoñ, nasabnāmoñ, jha-
gaṛoñ aur shariyat ke bāre meñ tanāzoñ se bāz
raheñ, kyoñki aisā karnā befāydā aur fuzūl hai.

¹⁰ Jo shaḥs pārtībāz hai use do bār samjhāeñ.
Agar wuh is ke bād bhī na māne to use rifāqat
se khārij kareñ.

¹¹ Kyoñki āp ko patā hogā ki aisā shaḥs ghalat
rāh par hai aur gunāh meñ phaṅsā huā hotā
hai. Us ne apnī harkatoñ se apne āp ko mujrim
ṭhahrāyā hai.

Ākhirī Hidāyāt

¹² Jab main Artimās yā Tuḥikus ko āp ke pās
bhej dūngā to mere pās āne meñ jaldī kareñ.
Main Nikupulis Shahr meñ hūn, kyoñki main ne
faislā kar liyā hai ki sardiyoñ kā mausam yahān
guzārūn.

¹³ Jab Zenās wakīl aur Apullos safr kī
taiyāriyān kar rahe haiñ to un kī madad kareñ.
Ḳhayāl rakheñ ki un kī har zarūrat pūrī kī jāe.

¹⁴ Lāzim hai ki hamāre log nek kām karne meñ
lage rahnā sīkheñ, khāskar jahān bahut zarūrat
hai, aisā na ho ki āḳhirkār wuh bephal nikleñ.

¹⁵ Sab jo mere sāth haiñ āp ko salām kahte
haiñ. Unheñ merā salām denā jo imān meñ ham
se muhabbat rakhte haiñ.

Allāh kā fazl āp sab ke sāth hotā rahe.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30